



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :



Tir Yimyim



tir_yimyim



tir yimyim

TAPAK 7

**Sikh nungertemi Congress lenir
Sonia Gandhi'er kima longkak ait**

**Russia telung nung US indang long-range
weapons amshitsü inyakteper: Biden**



VOL. XXI ISSUE NO. 330 (ADOK 330) DIMAPUR YANGTEPNÜ (THURSDAY) RONGJUI (SEPTEMBER) 12, 202 ₹ 5.00

Dimapur, Chumoükedima & Niuland nung ILP benoktsü; Nashi sentong magidaktsütsü



Nagaland government spokespersons & Ministers-
Temjen Imna Along & C L John.

Kohima, September 11, 2024 (TYO): Dimapur, Chumoükedima aser Niuland district tem nung Inner Line Permit (ILP) mapa tenzükang ta rongshia aruba mekoki Nagaland sorkari September 11, 2024 nü district asem nung ILP mapa tenzüksü lemtetogo.

"Chief Minister Neiphiu Rio lenisüba kübok Cabinet senden ka amendang iba lemtet agi" ta state Nagaland government spokesperson & Minister Temjen Imna Along-i ashi.

Naga Students' Federation (NSF)-i September 4, 2024 nü anogo 14 tsüngda district asem nung ILP mapa tenzükang ta sorkar nem mapang züngzükja lir. Sorkari iba mapa meinyakra Naga nunger kümzuka meyutetba aser sorkar ka teinyaktsü meinyakba ama züngshitsü ta NSF-i ashi.

"Dimapur district nung non-Naga nunger telemsa asem alitsü aser iba nung category I aser II atema ILP menüngdaktsü" ta Minister Along-i ashi.

Category-I nung December 1, 1963 nü Nagaland state anguba jakdang Dimapur nung arua alirtem adentsü. Sorkari parnok nem Smart Card facility agütsütsü aser Permanent Residence Certificate (PRC) o Domicile Certificate agizüksü lenmang lapoktsütsü ta pai ashi.

Category-II nung December 1, 1963 aser November 21, 1979 tsüngda Dimapur nung arua alirtem adentsü. Parnok nem Permanent Residence Certificate agütsütsü aser Domicile Certificate agizüksü lenmang lapoktsütsü ta Minister Along-isa ashi.

Category-III nung November 22, 1979 sülen Dimapur nung arua alirtem adentsü, ta paisa shisem.

Sorkari ILP agütsütsü atema digital system tashi itdaktsütsü aser iba ajanga permit aginürtemi zübazüba ILP agizükttetsü ta Along-isa metetdaktsü.

Nagaland nung kaketshirtem,

tesayurtem, technical personnel, business partners nem mapang talangba atema ILP agütsütsüla, khen nung küm 2-5 tashi agütsü junger ta pai ashi.

Nagaland kübok district asem nung kodang nungi ILP mapa tenzüksü ta osangbeneri metetnua asüngdangdang "State Gazette nung sangdongba sülen anogo ishika sülen mapa tenzüksü" ta Minister Along-i langzü.

Nashi sentong atema temelaba magütsütsü

September 28, 2024 nü Kohima nung Gau Dhvaj Sthapana Bharat Yatra atema temelaba magütsütsü ta Nagaland cabinet-i lemtetogo.

Iba sentong nung Jyotirmath nungi Jagadguru Shankaracharya Avimukteshwaranand Maharaj-i shilem agitsü aser Gau Mahasabha nung pai "nashi ya tetsü (mother) aser nashishi noktangsü" onük jembitsü

atonga lir.

"Bodbarnü State Civil Secretariat nung Chief Minister Neiphiu Rio menden ser state cabinet senden amendang iba lemtet agiogo" ta Nagaland government spokesperson & Minister C L John-i ashi.

Indian Constitution nung Arlla 371A ajanga Naga nunger tamangba yimsü aser inyaksangshi den Naga sobaliba ozüng aser inyakyim kümzuka lir ta C L John-i ashi.

"Tanü Cabinet senden nung Civil Society Organisations aser political parties-i Gau Dhvaj Sthapana Bharat Yatra anema noktakba benoka lemsatet. Tensa tiptema ayutsü tangatetba nung Cabinet-i iba Yatra agitsü asoshi temelaba magütsütsü lemtet" ta paisa ashi.

Sorkarisa iba telok dang Nagaland nung iba sentong agitsü atema maru tajungba ta bilemba Minister John-isa ashi.

Arishi küm 70 ser temapurtem Ayushman Bharat kübok adentsü

New Delhi, September 11, 2024 (Agencies): Arishi küm 70 temapur ajaka national insurance scheme Ayushman Bharat kübok health coverage agütsütsü ta Centre-i lemtetogo.

Prime Minister Narendra Modi menden ser Union Cabinet senden amendang iba ya mulunga agizük.

Ayushman Bharat Pradhan Mantri Jan Arogya Yojana (AB PM-JAY) ajanga senior citizens crore 6 den kibong crore 4.5 ajanzüksütsü. Iba free cover ya Rs. 5 lakh atema lir aser kibong sasep nung agütsütsü.

"Union Cabinet-i mulunga agizükba ajanga linük nung arishi küm 70 ser temapur ajaka AB PM-JAY tajangzük agitsü akok. Teintet rogotem nem AB PM-JAY kübok distinct card tasen ka agütsütsü" ta Centre-i tanü

metetdaktsü.

AB PM-JAY kübok densema aliba kibongtem nung arishi küm 70 ser tema teintet rogotem aliba kibongtemi küm shia Rs 5 lakh top-up cover talila angutsü, ta sorkarisa ashi.

Central Government Health Scheme (CGHS), Ex-Servicemen Contributory Health Scheme (ECHS) aser Ayushman Central Armed Police Force (CAPF) ama tanga public health insurance schemes agiba arishi küm 70 ser temapurtemi kasa scheme mesüra AB PMJAY shimsü akok.

Arishi küm 70 ser temapurtem shirnok private health insurance policy mesüra Employees' State Insurance Scheme kübok lir parnokki AB PM-JAY kübok tajangzüktem agitsü akok ta Centre sorkarisa jangjatsüogo.

Minister Imna Along-i Mumbai ken o jangjatsür

Kohima, September 11, 2024 (TYO): Mumbai Police nung Economic Offences Wing Special Task Force kati pa anema Preliminary Enquiry (PE) tenzükba ya pai tang cabinet minister inyakba den sendaktepa mali ta Tourism & Higher Education Minister Temjen Imna Along-i ashi.

Mumbai nung pa anema ken o ka benokbaji onük tejen ka atema lir aser iba mapang pa sorkar nung shilem kecha maliasü ta Minister Along-i ashi.

2014-15 tsüngda pa Mumbai nung liasü aser par medemer ka

company den shishilembabaren dak sendakba nung ken o benok. Mangatettep aser khuret ka ajanga company-i okadaki aoba lir ta pai ashi.

"Iba ken o ya okadak benoka lir aser ni agizüker. Ni kü tanishirtem den iba osang lemsatetogo aser parnokki kanga junga meteta lir" ta Along-isa shisem.

"Okadak ken o metembang tashi nisungtemi o mashii mejembitsüla. Shishilembabaren dak sendakba onük kar mangatettep lir aser okadak mepishiba ama itemji angatetteptsü" ta pai ashi.

NSF-i Gau Dhvaj Yatra magizüker; melidaktsütsü

Dimapur, September 11, 2024 (TYO): Naga Students' Federation (NSF)-ia sangdong ka nung September 28 nü Kohima nung agitsü aliba Gau Dhvaj Yatra magizükba metetdaktsüogo.

Iba sentong ya linük nung nashi metepsettsü dak rangloker agitsü aser iba ya Naga nunger anema lir. Iba sentong ajanga Nagaland nung kin balala

temeyoktep tiptema aliba nung mepetmesü adokdaktsütsü ta NSF-i ashi.

NSF-i iba sentong Naga lima nung magidaktsütsü kechiyong iba ya Arlla 371A kübok Naga nunger nem temeten agüja aliba anema dang masü saka Nagaland Legislative Assembly (NLA) aser state sorkari lemtet agia aliba anema lir, ta NSF-isa ashi.

"NLA aser Nagaland sorkari state nung "Ban on Cow Slaughter Act 2019" mebenoktsü lemteta lir. Arlla 371A kübok temeten agüja aliba nung ajemdaker iba lemtet agi aser iba anema ozüng benokba mesüra tangatetba melenshidaktsütsü merangba Naga nungeri magizüktsü" ta parnokisa metetdaktsüogo.

Nagaland nung gari lenmang balala atema senden menogo

Dimapur, September 11, 2024 (TYO): September 11, 2024 nü Deputy Chief Minister T.R. Zeliang-i Nagaland nung gari lenmangtem dak sendakba senden ka ayonga menogo.

Chief Secretary indang Conference Room nung amenba senden nung Chief Secretary, Engineer-in-Chief NPWD, Chief Engineer PWD (NH), Chief Engineer PWD (R&B), Executive Director (RO Kohima) NHIDCL aser Project Sewak (BRO) ketdangsurtem aden.

Tzünglu kanga aruba aser alima lendong balala ajanga Nagaland nung gari lenmang aika kanga mejungi akümba atema TR Zeliang-i tebilemstü abenba lemsatet aser lenmang anepalurtemi nendaka inyaktsü ayongzük.

NHIDCL kübok NH-29 4 Lane road aser NH-02 nung mapang shia anentsüh aser ali anenoka aiba timtem balala ajurua arur saka October tatemlen tashi nung 2-way traffic tiptema senzütsü ta senden nung NHIDCL Executive Director-i nangzük.

Paglapahar nung lenmang tuluka tzu agi ponger ogo aser iba atema NHIDCL-i khen atema traffic senzütsü tebilemba ka

Executive Director-i lemsatet.

Paisa ayong ajanga tarutsü nung ibala lendong majurutsü atema tzu ayimba melenshitsu shidang aser indangji Dy CM Zeliang-i Chumoükedima dang nungi temelaba meshia shidi zülutsü ashi.

Chief Secretary-ia NHIDCL dang iba mapa inyakdang tapoktsütem mamshitsü ashi.

Pherima aser Piphema nung anentsüh aliba lenmang tezülen okdena lir anungji ibaji merükttetsüla ta Chief Secretary-isa NHIDCL nem tetuyuba agütsü.

Dzudza anentsüh atema NHIDCL-i state sorkar dang hopta ka atema traffic shibanga atatsü mepishi. Iba atema parnokki District Administration den amalitepa inyaktsü aser senzüsenbonger nem timtem magütsütsü atema metetdaktsü.

NH-02 nung anentsüh aliba aser ali anenoka aiba sülen mapa inyakba October ita tashi nung renemtsü kechiyong contractor-i mapa tenzükogo ta NHIDCL-isa ashi.

KMC Old dumping site anasa NH-29 nung anentsüh alubaji NPWD (NH) kübok lir aser tanü nikongdang tashi nung lenmang lapoktsü ta Engineer in Chief aser Chief Engineer (NH) nati ashi.

State National Highway Department ket nung emergency aser maintenance works atema senotsü maliba ajanga Nagaland nung National highway balala nung mapang shitak nung mapa meinyakteter ta ashi.

Iba atema Dy CM TR Zeliang aser Commissioner & Secretary (W&H) nati department dang divisions balala nung rongdak mapa inyaktsü asoshi aser ano talisa NH-29 anepalutsü atema Additional fund meshitsü ashi.

Chief Engineer NPWD (R&B)-i NH-29 nung timtem adokdang by-pass roads 7 amshitsü osang lemsatet.

NH-29 nung kodang timtem ajurutsü meteta mali anungji by-pass roads anepalutsüba ya kanga tongtipang aser iba mapa nung temulung agütsütsüla ta Deputy CM aser Chief Secretary nati ashi.

"Alima lendong azüoktsü atema department ket nung tashi kecha mali saka kodangsa lendong atalokdir public tim metemdaktsütsüsa agency shiai mapa inyaktsüla. Agency ajak amalitepa inyakra alima lendong balala atalok yonga asenoki traffic tiptema senzütsüsa anepalutettsü" ta TR Zeliang-i ashi.

NECTAR Project ajanga school & department nem laptop agütsü



NECTAR Project ajanga school & department nem laptop agütsüba sentong nung tangokba noksa angur. (Kohima, Sept. 11, 2024)

Dimapur, Rongjui/Sept. 11 (TYO): Directorate of School Education office-i September 11, 2024 nü school aser department nem Advisor, School Education & SCERT, Dr. Kekhrielhoulie Yhome ajanga laptop tem amokja liasü.

Digitization ajanga shisaliok ketdangsüba tajungba kumdaktsüsü asoshi National Education Policy 2020 aser iba sülen Department of School Education ajanga policy balala yanglua amshir.

Item nüngdakbatem peritsü atema NECTAR project kübok sentong balala tenzüka lir aser yangji intra-school monitoring and administrative systems dena lir.

School aser department establishment telungzük nung infrastructure peria aliba ajanga dang itemi shidak inyaktetsü. Anungji NECTAR yagi item nüngdak peritsüsü asoshi inyaker.

Iba atema Directorate of School Education (DoSE) kübok Government High School 249 aser Government Higher Secondary School 55, District Education Offices, aser Sub-

Divisional Education Offices nem laptop tem agütsür. Laptop ya SCERT, SCERT kübok DIETs 8, NBSE office aser Department of School Education (Administrative office) nema agütsüogo.

Item laptop agütsüba sentong nung jembidang Dr. Kekhrielhoulie Yhome, Advisor, School Education & SCERT ajanga ashiba agi, NECTAR project nung mezüngbuba component ya governance system tajungba kumdaktsüsü lir aser yangji shilem ka ama laptop tem ya alemer.

Nagaland Education Service aser Nagaland Education Administrative Service atema sentong ka lir, ta pai ashi.

Teachers Attendance Monitoring System ajanga tesayur aser mapa inyaker indang data bendenba ya takok tulu lir, aser iba ya ajanga Department-i appointment aser retirement amala yimya angatetsü aser sentong yangluba nung yaritsü, ta pai ashi.

Tayongzükba balala liaka data-driver aser data-intensive process dangi melentsü

nüngdaker, aser ibaji ajanga governance system melenshitsü, ta Advisor-i ashi.

Laptops ya Department of School Education kübok school aser establishment ajanga atema lir, ta Principal Director, DoSE aser Project Director, NECTAR, Thavaseelan K, IAS ajanga ashi.

Laptop ajanga Nagaland tesem ajungalen government school tem nung sayuba aser angazükba yimya melenshitsü, aser iba project kübok Education Management Information Syatem ajanga digital infrastructure tashi itshtitsü ta ashi.

Iba sentong nung Avelu Ruho, NCS, Joint Secretary, DSE aser Deputy Project Director, NECTAR ajanga pela agizükba o jembidang school aser establishment ajanga dang laptop ya amshia data bendentsü ayongzük.

District ajanga nungi tanümba school temi laptop ya September 20, 2024 tashinung NECTAR office, Directorate of School Education nungi meshitsüla, ta laisa metetdaksü.

FMD Vaccination Mission round 4 buba tenzükogo

Dimapur, Rongjui/Sept. 11 (TYO): Department of Animal Husbandry & Veterinary Services, Government of Nagaland ajanga Nagaland Livestock Development Board (NLDB) den lungjemer Nagaland Livestock Development Board headquarters, Kohima nung September 11, 2024 nü National Animal Disease Control Programme (NADCP) kübok round pezü buba Foot and Mouth Disease (FMD) Vaccination Mission takok ngua tenzükogo.

Iba sentong nung Dr. Keweledo Mero, Project Director, NLDB menden liasü aser Dr. Khriekuolie Linyu, Managing Director, NLDB ajanga FMD atema National Animal Disease Control Programme indang overall roadmap rateta ashi.

Iba sentong ya Dr. Achila Ao, Director, Animal Husbandry & Veterinary Services, Government of Nagaland

ajanga semzüksü, kong Department of Animal Husbandry and Veterinary Services nungi ketdangsürtem, aluyimer aser veterinary professionals tem dena liasü.

Lai iba sentong nung jembidang state nung livestock economy aser yimyak-yimtsüing nung nüburtem dak kongshiba shiruru dak aliba tashidak azüoktsü atema bendanga agütsür inyaker, ta ashi.

Shiruru temang anema alitsü aser productivity tajungba akumtsü atema iba amala sentong ya kanga tongtipang lir aser taoba mapang vaccination drive nung takok ngua liasü, ta Director Dr. Achila Ao-i ashi.

FMD vaccination drive nükjidong ya state tesem ajanga nung kiset shiruru health tajungba kumdaktsüsü aser Foot and Mouth Disease samadaktsüsü asoshi lir. FMD ya virus ajanga menatepa aoba tashidak ka lir, koba agi nashi, jang, napong, sakoli aser ak dak kongshir.

2025 tashinung FMD azioktsü aser 2030 tashinung iba tashidak samadakja healthier livestock productivity lidakja yimyak-yimtsüing nung alirtem jenjang tajungba kumdaktsüsü aser linük indang food security jenjang tongtetsü mangdang yur sorkari linük tesem ajanga nung iba campaign ya tenzüka lir.


Testüiba mapang vaccination drive round asemben agiba ajanga state nung FMD ajemdaktsü aser iba sentong kübok kiset shiruru shilem 95 awajema lir.

Iba drive round pezü buba yagi 100% vaccination coverage tongtetsü nükjidong lir aser Nagaland nung shiruru ajak tashidak balala nungi kumzükba ayutsü.

FMD vaccination drive yagi Nagaland nung aliba district ajanga awajema veterinary team temi vaccine agütsüsü aser tashidak anepalutsü atema shiruru metsür nem shisatsü agütsüsü.

MENUNGRAA BILEMTETER

Oba, na akümli
tembanger memeteti
küm ka jungogo, onoki
na kodanga mamar.
Onoki ne leper
semdangogo. Tsüngremi
ne tanela maneni
tesünep nung yujangma
ta sarasademtsüogo.



Tsüktilemba Tzüdir, Kelingmen

Advisor Setrongkyu Sangtam-i Evaluation Reports sayatsü

Dimapur, Rongjui/Sept. 11 (TYO): Advisor, Information Technology & Communication, Economic & Statistics and Evaluation, Setrongkyu Sangtam ajanga September 11, 2024 nü Nagaland Civil Secretariat, Kohima nung Implementation of Integrated Child Development Schemes in Phek District, Ayushman Bharat in Dimapur District aser Kisan Credit card (KCC) scheme in Mokokchung indang Evaluation Reports sayatsü.

Iba sentong nung Advisor Sangtam-i report tem sayatsüba atema pelaba lemsatop, kechiaser iba yagi state nung nüburtem ajangzüksü ta ashi.

Item report ya ajanga department temi state tesem ajanga nung scheme balala

tajungba nung rangloker inyaktsü ajungmesotsü imlar, ta pai ashi.

Director, Evaluation, B Rendysowa Ao-i iba sentong tenzüka jembidang, report nungya scheme balala nungi ngutetba indang shia lir aser service tajungba nung agütsüsü atema suggestions aser recommendations agüja lir, ta ashi.

Item report yangluba nung shilem agiba ketdangsürtem danga pelaba lemsatop aser repot nungi state nung scheme balala mapa kuma aser tajungba nung inyaktsü atema shisatsü angutsü, ta ashi.

Iba sentong nung Evaluation department aser Secretariat Administrative Branch nungi ketdangsür aser staff tem dena liasü.

Fazl Ali College Mokokchung nung workshop ka agi



Dimapur, Rongjui/Sept. 11 (TYO): Fazl Ali College Mokokchung indang Conference Hall nung September 11, 2024 nü "Scouting, Documentation and Dissemination of local grassroots innovators from Nagaland" indang awareness workshop ka ayongzükba liasü.

Iba sentong ya Department of Environmental Science, Fazl Ali College, Mokokchung aser Research and Development Cell (RDC) Fazl Ali College, Mokokchung ajanga Department of Science & Technology, Government of India kübok Autonomous Body, National Innovation Foundation (NIF) den lungjemer ayongzükba liasü.

Iba workshop tenzüka Dr. Vivek Kumar, Scientist-F, National Coordinator, Scouting, Documentation and Database Management Division, National Innovation Foundation-India, Autonomous Bodies, DST-Government of India ajanga jembidang NIF yagi grassroot innovator aniteter aser tesendaktep yanglutsü atema tensa meteta nüburtem den jembishini akatsü tongtipang lir ta ashi.

Iba workshop yagi local innovators tem jangjateta len sayutsü aser nüburtem teyari nung network amenoktsü, ta ashi.

NIF yagi kaketshirtem

interns ama NIF portals balala nung inyaktsü atema teyari agütsür, ta paisa metetdaksü

Mezüngbuba technical session nung Dr. P. Tiatemsu, Assoc. Professor Dept. of Botany, FAC onir liasü aser Prof. Ashutosh Tripathi, HoD, Dept. of Environmental Science, Nagaland University ajanga "Scope of locally available Biowaste in livelihood innovators opportunities" onük nung jembia liasü.

Kasa session nung Sr. Innovation Fellow, National Innovation Foundation-India, Guwahati Cell for NE Region, Technology Complex, IIT Guwahati, Dr. Rajiv Mili-ia jembia liasü.

Tanabuba technical session ya Dr. B. Imnawabang Longkumer Asstt. Professor, Dept. of Economics, FAC lenisüba kübok agi, kong Dr. Akumtoshi Lkr, Entrepreneur Managing Director, Sutsung Enterprise Pvt. Ltd ajanga "Sharing of innovative entrepreneurship journey" onük nung jembia liasü.

Technical session atema sülen Local Farmers, innovators aser Local Healers tem den sensaksem mapang agia liasü.

Dr. E. Benrithung Patton, Convenor, Research & Development Cell, FAC ajanga sentong tembanga melepzung o jembia.



September 11, 2024 nü Uttar Pradesh kübok Greater Noida nung SEMICON India 2024 tetenzük sentong nung Union Minister of Electronics & Information Technology, Ashwini Vaishnaw-i Ato kilonser, Narendra Modi nem nungo ka agütsüdüng tangokba noksa nung angur.

Rara anentsü atema Ukraine-i India nem tongti shilem agidaksüner

New Delhi, Rongjui/September 11 (Agencies): India-i United Nations Security Council (UNSC) nung permanent menden aginüra Russia-i Ukraine anema raraba anendaksütsü atema India-i tongti shilem agitsü nüngdak, ta New Delhi nung Ukraine ambassador-i ashi.

“Ukraine-i, raraba linük ana tsünga India nem ken o jembidaksüner aser Russia den parnok (India) tesendaktep junga alibaji amshia yimjung ken o jembiba nung Russia nem shilem agidaksütsü atema ajungshitsüla,” ta ambassador, Oleksandr Polishchuk-i ashi.

Ukraine-i India dang, rara anentsü atema taküm November ita matongdang

yimjung ken o jembitsü atema senden ka ayongzükdaksüner ta shiogo, ajisüaka ibaji India-i melungtsü asü memelungtsüar memetet, ta paisa metetdaksü.

Polishchuck-i, “India-i United Nation’s Security Council nung menden angutsü nükjidong nung inyaker süra parnoki tongti shilem agitsüla,” ta ashi.

Paisa, “India-i Ukraine aser Russia na tsünga shidi belener ka ama inyakba jagi temelung sür dangbo malitsüla saka tongti shilem agitsüla,” ta ashi.

Raraba hadir aser totzü jenjang dalang agi agitsü atema India-i Russia dak metaloker, aser tang tashi nungbo Ukraine amakba atema India-i Russia maitsür.

Taküm August ita nung Ato kilonser Narendra Modi-i Ukraine yimtiba, Kyiv semdangba mapang nung pai Ukraine Tir, Volodymyr Zelensky dang yimjung ken o jembiba ajanga rara anentsü ajungshia liasü.

India-i Russia Tir, Vladimir Putin aser Ukraine Tir, Volodymyr Zelensky naprongla dang yimjung ken o jembiba ajanga rara anentsü ajungshir, ajisüaka iba dakji alia tongti shilem agitsübo arendaker. Mongolbarnü Germany nunga India Foreign Minister, S Jaishankar-i kasa oji dang jembiba liasü saka India-i yimjung ken o jembitsü atema senden ayongzüktsübo memetetdaksü.

Gujarat nung mejangjaba wara ka ajanga nisung 14 süogo

New Delhi, September 11 (Agencies): Gujarat nung Kutch district kübok yim tenet nung temang metaa shirangba mejangjaba wara ka ajanga tanur trok densema nisung 14 asüba sülen Gujarat sorkari specialist doctors aser medical team 50 item yimtsüng jagi yokogo.

State Health minister, Rushikesh Patel-i Bhuj nung senden ka ayongzüka iba tensa asadangba sülen pai osangbenertem dang, September 3 nungi September 10 tashi nung iba waraji nisung 48 dak putet, ta metetdaksü.

Tensa tamajungba atema

renema alitsü asoshi state sorkari Adani G K General Hospital nung isolation yipten 100, ventilator 30 aser BiPAP machines renema lir.

Patel-i, “Onoki cardiologist ka den mongin physician ana aser MBBS doctor tem leniba nung medical team 50 iba region jagi yokogo,” ta metetdaksü.

Health minister-isa, iba tensa ya süoki ia agitsüsa lir, ajisüaka iba wara ya coronavirus wara amabosa sashia meproksü, saka iba ama wara temaitsü lira tekeraba nung medical teyari bushiang, ta metetdaksü.

Animal Husbandry

department-i iba wara ya shiruru dak nungi menazükba tashidakbo masü, ta metetdaksüogo. Iba wara agi shirangertem dak nungi samples agizüka Gandhinagar nung aliba Gujarat Biotechnology Research Centre (GBRC) aser Pune nung aliba National Institute of Virology (NIV) dangi yokogo.

Iba wara ya tawa Kutch district nung tzunglu maneni arua tzümetsünga dak sendakba wara asütsüa akok ta bilemer. Shiranger kar dakbo pneumonitis temaitsü keta lir.

Health department-isa iba wara ya menatepba wara masü, ta metetdaksüogo.



September 11, 2024 nü Shimla nung Sanjauli kiyong ka nung Muslim nungertemi ozüng alema mosque ka asü, ta tai tonglokja Hindu nungertemi longkak aita mosque ji bendokjang ta takhangba agütsüdüng tangokba noksa nung angur.

Sanjauli Mosque ken o nung police aser longkak aiterem tsünga rara

Shimla, September 11 (Agencies): Himachal Pradesh yimtiba, Shimla kübok Sanjauli area nung Hindu nungertemi mosque ka ozüng alema asü, ta tai tonglokja longkak aitba manener; ajioda Bodhbarnüa longkak aiterem aser police na tsünga rara adoka liasü.

Longkak aiterem jagi mosque jagi aotsü meranga police-i ayuba tenokdangba tsükpoker aoba agi police-i tzü khaloktsüba den külemi ajok amshia liasü.

Bodhbarnü Hindu organizations balala nung züngsemtem aika Dhalli area nung adenshiba sülen iba mosque anema longkak ait.

Sanjauli nung Muslim nungertemi asüba mosque ji ozüng alema asü, ta tai tonglokja longkak aiterem jagi India wako amer ‘Himachal Ne Thana Hai, Devbhoomi Ko Bachana Hai’ aser ‘Bharat Mata Ki Jai’ ta yimyim ayima liasü.

Himachal Pradesh Chief Minister atema media advisor, Naresh Chauhan-i, BJP-i iba onük ya Hindu-Muslim onük ka kümdaksüner, ajisüaka iba onük

ya tensa raksaba onük ka lir, ta ashi.

“Adenshirtem ajakji ni meteta dang lir. Parnok ya BJP nungi nisung 20-25 shi liasü aser parnoki election nung BJP ticket nungi toktepogo. BJP-i iba onük ya linük onük ka kümdaksüner, ajisüaka iba ya Hindu-Muslim onük ka masü. Iba ta tzüzüng ozüng tensa ka lir, anungji ozüng kübok teinyaksü tim inyaksü. Chief Minister-i, ozüng alema kiojenji asü süra teinyaksü tim inyaksü ta shiogo. Iba mangatettep onük ya yimtenren tsütsü maongka tajung ta bilemertemi teyari mangutsü,” ta Naresh Chauhan-isa metetdaksü.

Himachal Pradesh Assembly nung opposition lenir, Jairam Thakur-ia Sukhu-ia aniba sorkar aija, ozüng alema asüba kiojen anema state sorkari menoa meinyaker, ta aitsüogo.

“Himachal Pradesh ya yimjung aliba state ka lir. Yangi tamangba lokti tsünga merarar, ajisüaka tangbo tensa ka adokogo. Sorkari menoa teinyaksü tim meinyakba agi nüburttem kanga jashir,” ta paisa metetdaksü.



September 11, 2024 nü Washington D.C nung Lok Sabha nung opposition lenir, Rahul Gandhi-i National Press Club nung osangbenertem den jembidang tangokba noksa nung angur.

Sikh nungertemi Congress lenir Sonia Gandhi'er kima longkak ait

New Delhi, September 11 (Agencies): Bodhbarnü Delhi BJP cell nungi Sikh nungertemi Lok Sabha nung opposition lenir aser Congress lenir, Rahul Gandhi-i US nung Sikh nungertem indang olen ka jembiba anema longkak aitogo.

Sikh nungertemji Sonia Gandhi'er ki 10 Janpath anasa adenshir yimyim ayima longkak ait aser parnoki Vigyan Bhawan tashi aotsü merang saka police-i nokdanga liasü.

Iba sentong nungji Sikh nungertem, tetsürtem aser BJP züngsemtem aikati shilem agi. Police-i longkak aiterem aika pua liasü.

BJP lenir RP Singh-i, Rahul-i bendanglen jembiba o anema tatok meshitsüla, ta takhangba agütsü. “Rahul Gandhi-i tatok meshitsüla. India tenüng menüksütsü atema pai bendanger li amshi. Korang asemtsü atema Sikh nungertem nem temelaba magütsür mesüra gurdwara semdangtsü memelar

ta pai jembigo,” ta Singh-i metetdaksü.

Longkak aiterem jagisa, Rahul-i Sikh nungertem mezüngmeshir aser 1984 küm Sikh nungertem anema rarabaji Congress party ajanga lir, ta aitsü.

Washington DC nung sentong ka nung jembidang Rahul Gandhi-i, RSS-i telemsa adokdaksüba onüktem ajungkettür aser yimsü, oshi aser kin kar ilatsür, ta jembiba liasü.

Iba sentong nungji Rahul Gandhi-i Sikh nungertem ka dang, “Korang sema alisang adianu, nü tenüng shiba?” ta asüngdanga liasü.

Iba sülen paisa, “Iba rara ya, India nung Sikh nungertem pei koranga asemtsü atema melatsü asü memelatsü, ta asüba rara lir. Mesüra Sikh nungertem ka ama pai gurdwara kati otettsü asü. Onoki iba raraji rarar aser ibaji pa atema dang masü saka yimsü ajak atema raratsür,” ta jembiba liasü.



TIR YIMYIM YIMOBILEM (EDITORIAL)

DIMAPUR YANGTEPNÜ, SEPTEMBER (RONGJUI) 12, 2024

Tanüang ken o jembi tenzüksü

Tanü Kohima nung Naga nung kin shia nungi dang masü saka Naga nung tongtibang lokti tentet ajak nungi teshimtetpurtem jadena Naga yimten tebilemstü ya koktettsüsa lenmang bushiteptsü asoshi Nagaland state government-i senden ka ayongzüka lir. Tereprangtsü nungbo iba senden ya ulura ka asütsü saka Naga yimten tebilemstü dak sendakba ken o jembitsü atema koba kin aser koba telokbo jaoker, koba kin aser koba telokbo odang toktsütsü, anungji ajak nem kasasa akhüm aser khuret agüja jaokbaji shitak ka inyakogo ta bilemer. Naga yimten tebilemstü ken o ya küm noklang ka jakdang Naga Club-i British India yimten den jembia aruba sülen, Naga National Council-i jepzüka Mahatma Gandhi, Jawaharlal Nehru aser Indira Gandhi nungertem den jembia aruogo. Ano NSCN telok tentetba sülena India yimten den Naga yimten temeten ken o jembipet jembia aruba tanü tashi jembidagi. Tajung kaji, tangbo NNC asüyonga, NSCN asüyonga Naga yimten nüchiso bushir teloktem India den yimjung ken o renema yur, tashiyim aser injang agi masü saka Naga nung o India nung lenirtem na külemi ajurutepa yimjung nung timi Naga yimten ken o süoka jembia latettsü merangba mapang lir. Ajisüaka, ano majung kaji, India den yimjung lenmang lapoka yur, Naga nung yimten nüchiso bushir telok NNC o NSCN na tsüngda koba teloki telok tasen teimba kümtedir ta tokteper amai Naga nung yimten nüchiso bushir telok kwiar Naga nungertemia memetet kümogo. Aji oda, Naga yimten telemtetba kati maru ser yamaisa züdaka yutsü nungbo, ashiko, mapang tatsüka tsüngda Naga yimten nüchiso bushir telok noklang junga küma aotsüa akok. Idangjibo, Naga yimten nüchiso tebilemstü agi Naga nung rongnung ozüng raksaba, rongsen raktepba aser saru sarutsü atema tashi toktepba tebilemstüang kümadoktsü. Iba timtem aser tebilemstüji joko tenzükadokogo. Aji oda, mi tuluka jangruloka maodang insep ama, tang ya Naga yimten tebilemstü ya kokteta telemtetba kati arutetra, iba jagi Naga nung taküm aika kümzüksü aser Nagaland auyia ponga tesüleni oa aliba ya anendaktsür tejakleni ao tenzüksü. Atangji, Naga nung ya India nung masü, anungji sobaliba aser temzüng ozüng külem ser melitettsü. Ibai Indiai meteta lir. Ajisüaka, ano Naga nungertem ya India nungi alia aser tzüa pilaa meyoktsü, aji Naga nungertemi meteta dang lir. Anungji, tang ya iba tsüngdaji telemtetba kati arutettsüsa lenjem ka bushitettsüla. Aji oda, Naga nung lushi Myanmar nung aliba yabo yutsür Assam, Arunachal aser Manipur yimten kübok aliba lushitem yaa Naga yimten ka kübok aittsüabajia tamakoktsü kümogo. Iba denji tanü lima ya akhi Naga Club mesüra NNC putu nung aliba lima to masü kanga melenshiogo. Kasaji, tanü lima ya küm 30 jakdang NSCN teloki bilemba lima toa masü, joko telong nung lia yimten nüchiso bushiba putu to süiogo, kechiyong alima nung kecha miima meyutetba putu ka nung asenok alir. Aji oda, tamaisü atema ali nung arrlong azünger dang ashi, alima ajak agi yimti ka amai kümer alima senso purtem yimten aser lokti nung shilem agir aser shishilembateper. Iba ama putu ka nung asenoka asen tenüngji dang shitak yurbo tang amai India den tangatetep tajungba nung alitsüabajiang asenok asoshi tajungba asütsü. Ajisüaka, küm noklang dak tali rarar asenokbo pei pei ajung asaa lemer senshitsu masüji, Naga yimten jenjang tasen ka nung tang aliba Nagaland asüyonga, Manipur, Arunachal aser Assam nung aliba Naga nung lushi aser yangji aliba Naga kintem asüyonga, Naga yimten ka küboka mesüaka tang dang nungibo yimten jenjang tajungba ka nung yimtenbo balala saka loktibo ka dang ta Naga nung tangatetep nung litettsüsa lenmang ka bushiteptsü nungdak reprangteter. Idangji, asenoki Myanmar nung aliba Naga nungertema mamadoktsüla. Atangji, Naga nung ajak atema Naga yimten jenjang tasen ka latettsüba tebilemstü aser tebilemba yagi Frontier Nagaland onük ya dena amsema jembitsü aser latettsü imlar. Joko, ken o bo mena jembiogo, saka Naga nung ajak külemi adenshiabo mejembidang, anungji tang Nagaland state government-i jatepba senden ya, tali süoki taiba nung Naga yimten ken o jembi tenzükshir asütsü.

OLEMSABANG

YI, YIJEMER, YIYOKER, YIOZÜNG

~ T. Meren Paul, Lower PR Hill, Kohima

Jokorla mapang tatsüka süia odagi, social media aser osang kaketdem nung Nagaland Liquor Total Prohibition Act, 1989, tatsüba agi NLTP Act indang kanga pulua jembia lemsatepdagi. Asenok Aor demi talisa jembir südi aser yijemer dang nungibo yi majemeri angтали saboa jembir aser Arogo aser Mungdangdemi kanga süoki yia jembir. Ibai tamangba yimsü palala süaka tamangba yimsü dak ajemdaker inyakba nung tera mesüktep inyakba ka, Hindu nung nashi shi machirdemi nashi metepsettsü aser nashi shi machitsüozüng yanglua sashia nokdakba den kanga mesüktepmapa agi puteper. Mahatma Gandhi-i nashi metepsettsü indang Hindu nungeri jembidang Muslim nung chiyongtsü kechiba asenoki nokdangtsü ta langzü, saka yi indang jembidangbo pai pa India nung anogo ka atema dangah Dictator inyakra pai India lima ajak nung Yi nokdangtsü ta langzü.

Ni yi majemer aser kodanga majemtsü aser ajioda NLTP Act, 1898 indang jempiba nung shilem magitsü bilema liasü saka September 3, Tir Yimyim adok nung kütinu A.M.Toshi, Former Director, Higher & Director Higher & Technical Education, pai asenok kowikati iba NLTP Act, 1989 ya züngdang ta asüngdangbaji tim asüngdang, nai ah züngdang ma aser angatetogo ma? ta pusema zülur. Iba Ozüng ya jungjunga angateta züngdanggrabang iba ozüng nung ya telok aser keja palala nem yi ayoktsü aser yi ajemtsü temelaba (permit) agutsütsü tejangja zülua lir anungji iba ya Nagaland Liquor Total Prohibition Act masü saka Prohibition Act ta ajatsüla kechiyong Total Prohibition nung yi ajemtsü ayoktsü permit agutsütsü lenla kecha temelaba malitsüla. Tang küm 35 amshia aruba NLTP Act, 1989 nungya yi ayoktsü, ajemtsü, yanglutsü aser yijok yanglutsü asoshi temelaba agutsütsü (permit) Ozüngnu peria shia lir aser Ozüng agi melaba amaji Nagaland nung yi angur aser amsema Ozüngi memelaba Yi-a talubosa angur.

NLTP Act, 1989 Chapter-II Section 3. Total Prohibition of liquor and Nagaland a dry State. No person shall (1) transport, import or possess liquor, (2) sell or buy liquor, (3) consume liquor, (4) manufacture liquor; and (5) use or keep any material, utensil, implement or apparatus whatever for manufacture of liquor.

Section 4. This Chapter Not to apply to certain Articles. Nothing in this chapter shall apply to-

(a) Any toilet preparation containing alcohol which is unfit for use as liquor; (b) any medical preparation containing alcohol which is unfit for use as liquor; (c) any antiseptic preparation or solution containing alcohol which is unfit for use as liquor; (d) any flavouring extract, essence or syrup containing alcohol which is unfit for use as liquor. Provided that such articles correspond with the description and limitations mentioned in Section 33. Provided further that the purchase, possession or use of any liquor or alcohol for manufacture of any such article shall not be made or had under permit granted under section 15.

Section 3 aser 4 ya temang ka nung tekabo tachichi aser tekabo tabilen ama tashi balala amshitsüshia angur. Section 3 nung tenokdangba zükdang ozüngji mamshitsü aser malentsü osetdem Section 4 nungji shia angur. Ano iba dak alia Yi, Yijok, Yi zü yanglutsü temelaba (permit) agutsütsü Section 12 aser Section 13 nungji peria shia lir. Ajidang masü temang atema (health ground) kidang yi ayutsü, amshitsü aser ajemtsü temelaba (permit) agutsütsü Section 14 nung makazüka lir. Section 15 nungji Foreigner, Diplomat aser Chidangodangdemasoshi special permit agutsütsüsadema lapoka lir. Section 17 nungji Armed Forces Canteen aser Mess nung yi ayoktsü aser ajemtsü melaa lir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Doulos Theological College ATA nung aniokogo



DTC Foundation anogo nung School Education Department nung Assistant Director, Wb.Takowatii jembiba aser DTC choir-i ken atenba noksa nung angur. (Dimapur, Sept. 11,2024).

Dimapur, Rongjui/ September 11 (TYO) : Dimapur nung Doulos Theological College tenzükter taküm küm agi küm ter asembuba nung Asia Theological Association (ATA) nung ‘Accreditation’ agüja aniokogo.

Tanü iba college tenzükter küm ter asem ajungba anogomung den repsema ATA nung accreditation anguba asoshi Tsüngrem nem tenüngsang agüja kümshiba sentong ka agia liasü. Iba sentong nung tongti o jembir Nagaland School Education department nung Assistant Director, Wb.Takowati-i jembidang, “asen limai mezüng Yisu temeim osangbener Dr.E.W.Clark pa kija aru, iba sülenang ka kinungtsü aser tangar missionary-tem aru. Iba amaji Tsüngrem mapaji kijai sarasadema tenzükter,” ta tayongzükba ka agütsü.

Paisa Laishirtem dang, Tsüngrem tenzükba wadang nung kong lidir liaka, pei alidak yimten aser loktiliba tensa tia angateta tenzüksü aser rongsen tsütsü tatidang nung metsüksüsa kümdanga alitsü ajungshi. Paisa laishirtem dang akok tashi pei lima aser nebortem meima Tsüngrem mapa nung tenzüksü aser tanelaren aser jakla yimya nung peisasa azüoka kümdanga aliba tenzükter taküm kaka asütsü ayongzük.

Iba sentong tetenzüklen, Doulos Theological College tenzükba indang ashidang, “2011 küm Tsüngrem dang wadang ka meshia lumia sarasadema mapang, theological college ka tenzüksü mangdang agütsü aser iba college tenüng Doulos yaa Tsüngremi agütsüba tenüng lir,” ta College tenzüksang aser DTC nung tir Dr.Onen Jamiri metetdaksü. Paisa iba college tenzükter küm 13 buba nung

ATA nung accreditation angutsüsa inyaktetba atema Tsüngrem nem tenüngsang agütsü aser teyariteperem ajak dang pelaba metetdaksü.

ATA kübok DTC nung laishirtem asoshi Diploma aser B.Th degree agüja tenzüksü aser tarutsü nung ano item denji metenloka temaba jenjang nung degree ngua züngtetsüsa tang nungi asentenshir meranga inyaksü ta DTC principal Rev.Dr. Nuklu Longkumeri metetdaksü. Paisa Tsüngrem nem tenüngsang agütsüba sarasadem mapang balaka agia liasü.

Iba sentong nung DTC nung tesayur Wb.Mulato T Kiho menden liasü aser DTC choir-i ken tajung ka aten. Iba sentong tenzükba DTC nung tesayur Rev. Toshi Longchari sarasadem aser Kachari Baptist Arogo nung sannüker Wb.Peter Basumatary-i sentong tembanga sarasadem.

ANOGO ABEN TSÜNGREM DEN

Pilaa Aliba Putepdaksü

"Aser nenok akhidang mapang, mapa tamajung agi temulung nung tsükchir kuma pilaa liasü."

Kolosi 1:21.

Tsüngrem mapa tulutiba rongnung kaji, meimchir melenshidaksütsübaji liasü. Tsüngremji tabensa, Pa melenshitsü menüngdak. Nisung atsüki nung tabensaba nung temenen taküm kati melen, aser iba anogo nung Kibubai nisung melenshidaksütsü asoshi sentong ka yanglu. Saka nisungi melenshitsü memulung. Anungji, alima den jungtepshitsü asoshi Tsüngremi kangki ajanga meimchir taküm nung mapa inyak.

Atsüki Kibubai nisung nungi pilaa mao, saka nisungi Kibuba nungi pila. Tsüngrem sentongji nisung den temeim nung telungjem alitsüba liasü. Lenmangji Par Chir zü ajanga dang takoktsü liasü. Kangki nung Tsüngremi meimchir jenjang melenshidaksü. Temelenshiji alima ajanga asoshi liasü. Kangki medeni jungtepshitsü asoshi Pai ajatsü makok. Kangki ajanga Khrista Kibur ta agizüka ajak temulung meyiptsü Pai ozüng agütsür. Temenen ajanga asenok Tsüngrem nungi pilar aser asen mulungjang nungi mapa tamajung adokdaksür, iba jagi asenok Tsüngrem anemer ta kuli agütsür. Iba yongji asen menen asoshi asütsü aser jungtepshitsü asoshi Tsüngremi Par Chir alimai yok. Iba yagi asenok Tsüngrem dangi aotsü tenokdangba ajak raksatsür aser Pa atongtsü takoktsü kümdaksür. Tsüngremi asen tamang nung mapa inyaker aser Pa den jungtepshidaksür.

Brazil kübok Amazon region nung nisung 14,500 dak tali baptiogo

September 11, 2024: Taküm küm tenzükter June ita tashi nung Brazil kübok Amazon region nung nisung 14,000 dak tali baptiogo.

Osangbener den jembidng arrshi küm 83, Ramos-i, “Ozü kibong aser ni yangi (Amazon region) dang inteta liasü. Otsüla, oboula aser ozü tsüraburtem iba kidang ali aser iba kidang lia süadok. Ni-a iba kidang aso aser ni-a yangisa lia asütsü,” ta metetdaksü.

Paisa, tanga yimti ka nung oa alitsü dang nungibo pai ayong anasa aou agi asüba kiji kodanga toktsür maotsü, ta ashi.

“Yimti dang nungibo yangi temekongba. Yimti nungbo sademsadema mesenzüteter. Yimtitem nungbo lendong kanga ataloker, gari tali aser nisung tali. Ni yangibo lendong kodanga majangshidang,” ta paisa shisem.

Amazon rainforest shilem 60 shibo Northwest Brazil nung lir. South America nung rainforest ji 6 million square miles lir aser tang Amazon nung million 30 bo rainforest nungji alir.

“Ni asoshi Tsüngremji ajak. Tsüngremji kübu aser Yisu makaibo ni tazüngla,” ta Ramos-i ashi.

Belem Foursquare Church nung pastor, Josué Bengtson-i,



Amazon Region nung baptidang tangokba noksa nung angur.

“Tanü putu dang nungibo akhi putu nung timtem taliba ajangshia liasü, ta ashi.

Bengtson ya mezüngbo missionary liasü iba sülen pastor kuma pai Amazon region nungji Khrista osangtajung proker.

“Iba region nung Khrista osangtajung prok tenzükba mapang nungbo wadang inyaker ishika dang liasü aser municipalities-a kar dang liasü. Moapu nung ayongzükba tekülem sentongtem nung adentsü atema pastor temi kilometer 10 nungi 15 tashi tetsüng agi jajatsüsa aküm. Tanü putu nungbo Amazon nung aliba Arogo shia ket nung rong lir,” ta metetdaksü.

Bengtson-i yarisema Amazon nung mezüngbuba Foursquare churches tenzükba

liasü aser tangbo region nung Foursquare churches 3,200 lir.

“Taküm küm tenzükter mezüngbuba ita trok (June) tashi nung onoki nisung 14,500 baptitsüogo. Taküm küm tatembanglen tashi nung nisung 30,000 dak tali baptitsütsü onok nükjidong lir,” ta pastor-isa metetdaksü.

Amazon arem tiyong nung küm 32 tashi missionary inyaksang, Esequiel Santo-i, “Tayongzükba tulutibatem rongnung kaji azüngmeyakba aser ayongküm nung lisopurtem den külemi alitsü liasü. Ajisüaka mapang ajak nung Tsüngrem onok den liasü. Taküm aika melenshiba onoki nguogo aser nisung aikati Khrista osangtajung angashiogo. Tang onoki süngjang atangba angur,”

ta metetdaksü.

Paisa, “Ni Rio de Janeiro nungi lir. Akhidangbo ni tayimtsü ticket-a maliteti liasü anungji anogo troknü tashi bus ajanga Belem tashi ao. Iba nungjagi no anogo troknü rong ajanga Amazon basin-i ao. Iba nungjagi rong ka nung anogo 15 agia Solimões ayong aser Purus ayong tashi aoba sülen kanga tezülen aliba nüburtem aliba tesem tonga yangji onoki mission wadang inyak,” ta metetdaksü.

Brazil nung sociologist, José Eustaquio Alves-i, Santo ama mapang talanglang pastor mesüra missionary inyakertem ajanga evangelical Arogo tem nung temelenshi tulu adokogo, ta ashi.

“Catholic Arogo temi putir

tasenpurtem nem training agütsütsüji kanga tasak, ibayongji Amazon nung aliba Arogo tem lenitsü atema putirtem peria mali,” ta ashi.

Dr. Alves-i, “Ita shia putir kati khen dang Amazon-i oteter aser aiben kanga tezülen aliba tesemtemi aoer. Ano külen Evangelical Arogo temi kanga kera pastor tem nem training agütsür Arogo tasen tenzükdaksür,” ta metetdaksü.

“Tanübo evangelical Arogo tila aika tenteter. Onoki Brazil nung kanga yongyaa aliba revival Amazon nung tenzükogoo ta onok bilemer,” ta Alves-i ashi.

Brazilian senator aser evangelical Pastor, Damares Regina Alves-i, iba mapang ya sayatenya mapang lir aser iba ya ajanga tanela asüngsashiba dang masü saka lokti yangertsü atema nüburtem ajungshitsü, ta ashi.

“Küm aika nisungtemi Amazon ya ayongtem aser süngdong aika aliba arem ama dang bilema liasü, ajisüaka tanübo nisungtemi Amazon nung nisung aika lir aser parnoki Khrista osangtajung den külemi teyari balala nüngdaker ta metetogo. Arogo ajanga ibaji asüngsashidar,” ta paisa metetdaksü.

AO OSHI ANGAZÜKDAK: TANÜ ANGAZÜKTSÜBA OJANG



Tanaben

(adv)anabenbuba, ano khen (second time)

* Yisu Khrista tanaben alimai arutsü.

Tanak

(adj) sentsü tammang, tesangwa masü (black)

* Africa nunger tereprangtsü sentsü tanak lir.

OLONG PAITEP # 6921

1			2		3		4		5
6		7							
					8				
9				10					
							11		
			12						13
	14								15
					16				
			17						
								18	
19									

TIPIEN

- 2. Teburtemi tejak nung awaba - (8)
- 6. T ___ em - (3)
- 8. Tzüak ayudak - (3)
- 9. Nüngdakba dang timba - (6)
- 11. Züina ao - (4)
- 12. Yangi tzü angur - (5)
- 14. Tangar dang nungi tali - (4)
- 16. Senyong masü - (6)
- 17. Oadokdi - (3)
- 18. Tzü tarok - (3)
- 19. Yimtaklir aikati iba ya ki den külemi yanglusemer - (8)

LANGTSÜNGLEN

- 1. Temejangdak - (6)
- 3. Nisung ka mapa inyaksü nübo - (4)
- 4. Azüntsü asoshi mejemba - (6)
- 5. Tesangwa agütsüba - (5)
- 7. Tila masü - (4)
- 10. Tebenjem tetsür chanu - (4)
- 11. Tekolak nung inok - (4)
- 12. Tetsüingda - (6)
- 13. Tangar inyakba ka inyak - (6)
- 14. Tim masü ta ashi - (5)
- 15. Asalendong - (4)
- 16. Tanü dangtsü - (4)

OLONG PAITEP # 6920 TELANGZÜBA

TIPIEN :

- 1. Telok, 4. Aluru, 6. Ozüing,
- 8. Emk, 9. Kin, 10. Teti,
- 12. Süir, 13. Jen, 14. Ola,
- 16. Talak, 17. Mazük.

LANGTSÜNGLEN :

- 1. Tenükjang, 2. Luden,
- 3. Kiochtsü, 5. Lenti,
- 7. Tajangzük, 11. Teronem,
- 12. Sempa, 13. Jahaz.

NAI-A YA METETTER MA



Taküm August ita Norway-i electric vehicles teimtiba ayokba world record ka yanglutetogo. Norwegian Road Federation (OFV) ajanga ashiba agi electric vehicles 94% ayokba nung Tesla Model Y 18.8% liasü. August ita Norway nungeri EVs 10,480 ali aser iba ya taküm küm tenzüker gari 68,435 ayokba liasü.

Norway-i world record anguba ya parnoki sensotem nem electric vehicles atema tajangzük balala agütsüba ajanga lir. Norway-i tax benefits aika agütsüba ajanga EVs kanga ayoker aser sorkari parking, tolls aser ferry tickets jenjang dalang agir aser lenmang aika nung EVs nem bus aser taxi lanes amshitsü temelaba agütsür.

Central YMA-i Rs 5 crore alang drugs rakxaa endok



Aizawl, September 11, 2024
(Agencies): Central Young Mizo Association-i Mongulbarnü Rs. 5,58,45,780 alang drugs rakxaa endokogo.

Yashi rakxaa endokba drugs ji December 2023 nungi CYMA nung anti drug squad ajanga putenba liasü aser drug enforcement authorities-i apuba maden.

CYMA-i heroin,

Methamphetamine, Ganja, cough syrup aser tanga prescription drugs aika rakxaa endok.

Mizoram nung drugs kanga bulua amshir aser 2021 nungi Heroin seret aika pua arur, ta Central Young Mizo Association President Lalhmachhuana-i ashi.

"Mizoram nung arua jenokba Burma refugee tem pelashishia

agizüker aser onoki parnok khurettem angateter. Ajisüaka iba nung maongka agia nisung kari Mizoram telungi drugs miima shibelener aser lanur taküm raksatsürtem onoki metoktsütsü" ta pai ashi.

Sorkari drugs shilebenertem anema inyaksüla aser drugs abenba gari driver tem permits & licenses meyipa agitsüla ta Lalhmachhuana-i ashi.

Arunachal nung 12,500 MW hydropower project 2 lapoktsü

Itanagar, September 11, 2024
(Agencies): Taruba küm ana tsüingda hydropower projects ana mapa tenzüksü aser iba ajanga 12,500 MW combined installed capacity agütsütsü ta Arunachal Pradesh Deputy Chief Minister Chowna Mein-i ashi.

Lower Dibang Valley district kübok Roing nung Solung benjong nung jembidang Deputy CM Mein-i iba osang metetdaksü.

Iba mapatong ana ya NHPC, NEEPCO, THDC aser SJVN dena CPSUs ajanga ketdangtsütsü ta pai ashi.

Sangküm nungi hydropower

projects pungu mapa tenzüksü aser 2026 o 2027 nunga asemsem tenzüksü sentong lir ta paisa shisem.

"Item hydropower projects ajanga Arunachal Pradesh aser linük nung nung power nungdakba nung yarisemtsü aser rongsenketzung renloktsü" ta Mein-isa ashi.

Tzünoktang tululu yangluba ajanga state nem tajangzük aika bentsür arutsü kechiyong item ajak ya multipurpose projects lir ta paisa metetdaksü.

"Item mapatong nungi power agitetba dang masü saka tsüinglanglen tzü yima aluba

azüoktsü aser alu o angotzübo asoshi tzü amshitsü. Item mapatong ajanga tourism ajungkettsü aser mapa aika adokdaksütsü" ta Deputy CM-isa ashi.

Iba mapatong ana ajanga küm shia Rs 1,836 crore aazüktsü aser lanurtem ajangzüktsü ta pai ashi.

"Arunachal Pradesh sorkari arrtsülen aliba yimtsüngtem nunga hydro projects tilala inyaksü sentong lir. Iba ajanga meta talang pilar aliba yimtsüngtem, defence personnel aser military set-up ajangzüktsü" ta Mein-i ashi.

CoTU-i Kuki-Zo nunger atema administrative setup balaka meshir

Imphal, September 11, 2024
(Agencies): Central Bureau of Investigation (CBI)-i Kangpokpi district nung Kuki-Zo nunger dak dang tenük yoka inyaksangshiba aitsür ta Committee on Tribal Unity (COTU)-i metetdaksüogo.

COTU-i September 9, 2024 nü Sadar Hills Kangpokpi nung aliba Thomas Ground nung "5 Points Declaration" bangzüngtepa renemogo ta metetdaksü.

Iba sangdong nung Manipur sorkari tetuyuba agütsübatem tenemlen Kuki-Zo nunger alidak mamshitsü shia lir.

Kuki-Zo nunger temeten kümzüka ayutsü aser temeten mangu tashi COTU-i iba lemtet agiogo ta ashi.

Manipur sorkari Kuki-Zo nunger züingdokba aitsür anungji Sadar Hills Kangpokpi nung local administrative bodies-i state sorkari tetuyuba

agütsübatem sülen manidaksüla. Item ajanga Kuki-Zo nunger asoshi lendong bentsür arutsü aser tensa mesüngjem tashi yamaji dang inyaka aotsü ta COTU-isa ashi.

COTU-isa Kuki-Zo nunger atema separate administrative setup balaka tentettsü takhangba nenshia metetdaksüogo.

Indian Constitution nung Arla 239A kübok Union Territory ka akümtsüla ta parnokisa ashi.



Arunachal Pradesh yimtiba Itanagar nungi tetsür kaketshir aseme World Robotic Olympiad (WRO) national-level competition nung shilem agitsü. Par aseme Robo Mission kübok junior category nung tokteptsü. Kaketshir asem ya Tagru Loli (Class XI, JP Public School), Tinyo Sarah (Class VIII JNK Public School) aser Takhe Mumpi (Class VIII, Holy Cross Higher Secondary School) nunger lir. Parnok asem ya Arunachal Pradesh Science Centre nung Innovation Hub nung innovators lir aser Kolkata nung regional event nung shilem tajung agiba ajanga New Delhi nung national level nung tokteptsü maongka angu. Innovation Hub ya Arunachal Pradesh State Council for Science & Technology (APSCST) lenisüba kübok amenokba lir.

Russia telung nung US indang long-range weapons amshitsü inyakteper: Biden

Washington, Rongjui/Sept. 11 (Agencies): United States-i yangluba long-range nok-nü Russia linük telung nung Ukraine nem amshidaksütsü asü-masü ta kü administration-i inyaktepba mapang lir, ta US Tir Joe Biden-i ashiba ajanga Moscow nung ain adok.

Anüolen linük temi agütsüba long-range nok-nü amshitsü tenokdangba agüja aliba agienjang, ta Ukraine Tir Volodymyr Zelenskyy-i maneni ajungshia arur, kechiaser par sepai nem Russia linük telung nung aliba airfields, ammunition depots aser command centres tem makdaksüner aser Moscow-i Ukraine amakba nung sen timba indokdaksüner.

Mongulbarnü osangbener temi Biden dang Russia linük telung nung aliba tesemtem amaksü asoshi Ukraine nem iba ama missiles ji amshidaksütsü asü masü ta asüngdang dang, "Tang onok iba indangji inyaktepar," ta pai langzü.

Iran-i Russia nem missiles agütsür ta US-i asadangtetba sülen pai iba o ya ashi.

Pai iba o jembiba ajanga Moscow nungi kanga kera aitsü aser Russia indang parliament nung lower house, State Duma tekolakba Vyacheslav Volodin-i iba ama mera yagi US aser par tembar linüktem rara nung party ka akumtsü aser Russia-i tashi tuluba aliba nok-nü amshitsüsa akumtsü, ta ashi.

Ukraine nem Russia linük telung nung yia maktetsüsa US-i yangluba missiles amshidaksüra, ibaji Washington asoshi policy nung temelenshi tulu alitsü. Kyiv nem mitkar tsütsü teyari sen \$56 billion dak tema indang agüjaka tang tashi US-i long-range missiles ajanga tensa tamajungba akumtsü atema shisabolur.

Ukraine indang danga tembar linük temia nok-nü agüja lir, saka Russia linük telung nung kechi yimya ka nung amshitsü, item tenokdangba dena lir, kechiaser Ukraine-i item nok-nü amshira Russia-i tayang kepzüksü aser NATO linüktem rara nung ajemoktsüsa akumtsü.

"Onoki iba long-range nok-nü ya sadanger aliba Ukraine litsü nung dang masü saka Russian litsü nunga nungdaker, aji asünung dang yimjung bushitsü atema Russia ajungmesotsü," ta Zelenskyy-i taoba hopta Germany nung shia liasü.

"Onoki Russian yimtittem aser Russian sepaitem nem parnoki kechi nungdaker, aji bilemdaksüner: yimjung mesüra Putin," ta pai Russia Tir Vladimir Putin athishia ashi.

US Secretary of State Antony Blinken aser British Foreign Secretary David Lammy nati Bodhbarnü Ukraine

yimtiba Kyiv semdangba mapang Ukraine-i long-range nok-nü amshitsüba indang jembitsü akok.

Blinken-i London nungi osangbener den jembidang Russia nung iba ama nok-nü amshitsü asoshi Washington-i melatsü-memelatsü indang mashi, saka tensa balala asadangtar ta ashi.

"System ya dang züngshitsüba masü. Ukraine-i iba nok-nü ya junga amshitetsü asü masü ta asüngdangtsüla, kechiaser iba atema training balaka nungdaker, aser aji temogo. Parnoki aji anepalutsü tashi lir na?" ta Blinken-i ashi.

Bodhbarnü Britain-i Russia indang "shadow fleet" nung rong 10 nem tenokdangba agütsüogo, koba ajanga anüolen linük temi Russia nung totsü mabentsü tenokdangba agüja aliba nungi jenshia totzü belenba nung amshir, ta Lammy-i ashi.

"Tanü tenokdangba agütsüba ajanga Russia-i shadow fleet ajanga totzü shishilempaba tashi nung

tetsükdaksü ajurutsü," ta pai sangdong ka nung ashi.

"Külem partners den külemi onoki maneni Russia dang Ukraine den international community nokdaka lir aser iba 'illicit fleet' ya odangbo metoktsütsü ta ashitsü."

Taoba ita Ukraine sepaitemi Russia indang Kursk region telungji ajungbena nungboka ia Russian sepaitem aoksadaksür sülena Moscow sepaitem Donbas region leni maneni aitba mapang ka nung US-i Ukraine nem long-range missiles amshidaksütsü indang ken o ya temai adoker.

Russia-i tawa Ukraine nung drone aser missile amshia amakba tali kumogo, aser Ukraine-ia Russian litsü nung long-range attack drones noklang aika khaloktsüogo.

Ita tatemlen Zelenskyy ya US-i aotsü aser Biden aser November ita tir election nung tokteptsü aliba nisung ana den par sentong lemsateptsü, koba ajanga rara tatem leni arutsü pa teimla lir.

O intepba nung Trump dang Harris-i shilem tajungba agi



Philadelphia, Rongjui/Sept. 11 (Agencies): Mongulbarnü presidential debate nung Democratic candidate Kamala Harris-i la den tokteper Republican candidate Donald Trump tekong meranga nokdaksüsa jenjang nung yuja pa tir mapa inyaksü asoshi temang agi metemsüba, pai abortion nokdanga aliba bhukuma nokdakba aser pa anema ken o aika benoka aliba indangjemi.

Taoba mapang prosecutor mapa inyaka alila arishi küm 59 tain Harris-i tetenzükdang nungi iba o intepba amokbanga arishi küm 78 tain Trump ain adoker ama kuma telangzüba tiazü aika agüja liasü.

O intepba mapang khenbo lai taoba tir jashidakja anibelemba aser alakba agi nüburtemi aiben pa indang nübuyim sentong nungi kera aor, ta ashi.

Trump, shiba Harris nübuyim sentong nung nisung adenba kisüngia tezü danga aru, pai "Kü rally tem tuluba, yimten yimsüsüba puti otsü nung tajungtiba rally lir," ta langzü.

Iba sülen pai Springfield, Ohio nung immigrants temi azü achir ta tiazü ashi, koba social media nung prokshir aser Trump

indang vice presidential candidate Senator JD Vance-i tali temai adokdaksü.

"Parno azü achir! Linüki aruba nüburtemi tanü achir! Yangji aliba nüburtemi mesüba shiruru parnoki achir," ta pai ashidang Harris mamangteti menu. Election agitsü hopta t ilia aser state kar nung jelia voting tenzüksü anogo ishika dang lia iba o intepba ya candidate anaprong atema television ajanga repranger mulung nung kongshitsü maongka liasü. Tang tashinung tena tsüngta o inteptsü sentong ibai dang lir.

Tena immigration, foreign policy aser healthcare indang onük nung kanga sashia langzütep, saka policy tejangja indang nungbo retreta mokongshi.

Trump-i maneni tiazü jembia 2020 election nung tamakok ajuruba ya ashikülak mapa inyakba ajanga lir ta ashi aser Harris ya "Marxist" lir ta shia migrant temi azüdokshi mapa inyaker ta tiazü ashi.

Harris nübuyimba nung jenjang tajungba kuma nungtugu kentener Taylor Swift-i iba o intep temli Instagram nung la sülen anidaker nisung 283 million dang lai November 5 election

TENÜNGSANG AGÜTSÜR

Yaongyimsen Liden Semchir llangtsür Telongjemi Mr & Mrs Aochuba lmsong-er jala Kr. Wataro lmsong lai NPSC-NCS, NPS & Allied Services 2023 exam nung mapa tulu S.A (Secretariat Assistant) under Personnel & Administrative Reforms Department nung ngutetba asoshi ozü Yaongyimsen Liden Semchir llangtsür Telongjemi pelar aser konang tetushi tulu agütsür. Ano maneni la wadang aser tarutsü anogotem nung teyanglur Tsüngremi moajang ta onok Sarasadem



Sd/- Takasangla (President)

Sd/- Lanuinla (Secretary)



Israel mitkari occupied West Bank kübok Tubas yimti nunga operation tenzüka curfew sangdongogo. Kasa mapang rara anema longkak aiter tali kumtar. Australia nunga nüburtemi ceasefire khanga Melbourne nung longkak aitdang Australian police den raratepa tear gas aser rubber bullets amshitsüsa akum.

nung Vice President Harris aser la indang running mate Tim Walz yaritsü ta sangdong.

Online prediction market PredictIt indang 2024 presidential general election market nung o intepba mapang Trump-i takok angutsü teimla shilem 52 aliba nungi shilem 47 dang kumogo ta sayur aser Harris ya shilem 53 aliba nungi shilem 55 kumogo.

Mongulbarnü o intepba nung tamang kaar Harris indang campaign-i Trumpdang October ita tanaben o inteptsü jazüka liasü.

Ajisüaka Trump-i Fox News dang "Lai tamakok ajuruba ajanga ano o intepner," ta ashi.

"Ni iba indang bilemdangtsü, saka nai o intepba nung takok ngura, ni shilem magitsüla ta bilemer. Ni kechi atema ano o inteptsü?" ta pai ashi.

Iba sentong nung shilem magidang Trump-i Harris kanga mezüngmeshia o jembia aru aser onir-i iba indang asüngdang dang, "La kechi sünür südakjang, ni iba atema bilema mali," ta Trump-i langzü.

Harris, shiba Black aser South Asia nungi jakzüka lir, lai "Nisung sentsü amshia America nübur telemsa adokdaksütsü merangba nisung kati tir kumnüba ya tesasatsü ka ama bilemer," ta langzü.

Trump-i takep ayoker ka nem sen agütsüba miimbangtsü merangba aser pa anema danga ken o balala benoka aliba indang lai aitsü. Trump-i anosa aibelen masü ta ashi aser Harris aser Democrats temi kuli makai ken o atsüshir ta aitsü.

O intepba sentong ya nikongdang 9:00 ako (par

mapang) tenzüka aser tesüngmangtsüka tena teka amtepa salemtep. Tena ya taoba mapang khen danga majurutepi liasü. Harris ya Trump nokdaka alileni oa la tenüng ashi aser teka agi salemtepa liasü, koba 2016 sülen presidential debate nung mezüngbuba salemtepa alitsü. Iba ya Harris atema kanga tongtipang liasü, kechiaser vote agütsütsüpur nisung aikati la indang junga memetet ama opinion polls nung sayur. Harris ya hopta tenet tejakdang Tir Joe Biden ainshiba sülen tir asoshi tokteper tenzüka.

Harris-i abortion nung tenokdangba agütsüba anema jemi aser tetsür nem emergency care magütsüba indang temulung agüja jemi, kechiaser 2022 küm US Supreme Court ajanga linük tesem ajunga nung iba temeden ya agiena liasü.

Trump-i national ban bhukumtsü ta lai ashi aser Trump-i yamaji bilembaji shidak masü ta ashi saka iba ama ozüng pai veto asütsüba meshisem.

Tena ya rongsenketzüng nung rangloker o intep tenzüka, iba ken o nung opinion polls ajanga Trump bhukumba sayur.

Trump-i foreign goods nung saru tali meshitsü tebilemba aliba nunga Harris-i aitsü aser makamaiter aser businesses tila inyaker dang saru tajemba meshitsü la sentong aliba ashi.

Tena ya Israel-Gaza rara aser Russia-i Ukraine amakba mechi o atsütepa liasü saka katiara rara atemtsü atema inyaksü sentong tejangja mashi.

Yonex Sunrise North East Zone Inter State Badminton Championship temogo



Dimapur, Rongjui/Sept. 11 2024 asayamung nung liasü. (TYO): Guwahati nung Nagaland nungi asayar 23 September 7-10, 2024 (tetsür 12 aser tebur 11) aser anogtem aliba Yonex Sunrise North East Zone Inter State Badminton Championship

Nagaland nungi medal anguba yamai alitsü:

S.no	Category / Event	Name of player(s)	Medal
1	Team Championship (Women)	Team	Bronze
2	Women Double	Leimapokpam Diana & Huidrom Chanu Vilinda	Bronze
3	Mixed Double (Senior)	Peramrisi Zeliang & Debahuti Lahon	Silver
4	Under 19 Boys Single	N. Yohenba Singh	Gold
5	Under 19 Boys Double	Nchatu Herie & Bovi K Chishi	Bronze
6	Under 19 Girls Double	A.Ponlih Konyak & Imlikumla	Silver

World Cup qualifying nung Brazil aser Argentina tamakok ajuru

Rongjui/Sept. 11, 2024 (Agencies): 2026 World Cup atema qualifying matches asayaba nung Brazil ya ponguben asayaba nungi pezüben buba tamakok ajuru Paraguay-i 1-0 agi akok aser Argentina ya Colombia-i 2-1 agi akok.

Inter Miami nungi asayasang Diego Gomez-i Asuncion nung asaya tenzüker minute 20 buba nung Paraguay asoshi goal ka ya agütsütet aser first half nung Brazil-i target nunga ball kata memetsüloksütet.

Brazil nunger asaya tenzükdang Liverpool goalkeeper Alisson, Newcastle midfielder Bruno Guimaraes aser West Ham playmaker Lucas Paqueta nunger den Real Madrid nungi Rodrygo, Endrick aser Vinicius Jr nungertem asaya liasü.

"Fans tem dang tatok meshir, tangya mapang tamajung lir, saka onoki tajungba kuma asayaner," ta Vinicius-i Brazilian TV channel Globo dang ashi.

Arishi küm 24 tain winger yagi taoba season asem shia nung Real Madrid asoshi goal 20 dak tema agütsüteta lir, saka Brazil asoshi 35 ben asayaba nung goal pongu dang agütsüteta lir aser 2022 World Cup nungbo goal kata magütsütet.

"Kü sempet aser national

team asoshi ni kechi inyaktettsüar meteta lir. Nai tamang makatetra goal magütsütettsü," ta pai ashi.

Iba result yagi world champions ponguben nguteta aliba Brazil ya asaya ti nungi asember dang takok ngur qualifying table nung jenjang pongu buba nung lir.

Kasa mapang asaya danga ka nung Lionel Messi mali asayaba tang world champions Argentina madak taoba Real Madrid aser Everton midfielder James Rodriguez-i goal ka agütsüteta takok angu.

Ibai Colombia asoshi mangyangba liasü, shirnok ita ana jakdang Copa America final nung Argentina-i akok.

Arishi küm 33 tain Rodriguez ya tang La Liga nung Rayo Vallecano nungi asayar aser pai cross ka agütsüba nung Wolves nungi Yerson Mosquera-i minute 25 buba nung tekolak agi goal mezüngbuba tonglokja liasü.

Anisüngzüker minute asem sülen Nicolas Gonzalez-i iba goal kepzüktet saka Nicolas Otamendi-i Crystal Palace nungi asayar Daniel Munoz dak tai menaba ajanga video assistant referee review sülen penalty agütsü.

Captain Rodriguez-i Aston Villa goalkeeper Emiliano Martinez ya tezülani yoka minute 60 buba nung spot

nungi goal ya agütsü.

Team 10 aliba table nung Argentina ya temaba jenjang nung points ana agi second-placed Colombia dang timba nung lir.

18 rounds of fixtures sülen temaba jenjang trok tashinung aliba team tem pasasa qualify asütsü, koba September 2025 tashi asayatsü lir. Jenjang tenet buba nung aliba team ya danga confederation nungi team ka den intercontinental play-off asayatsü.

Asia indang World Cup qualifiers nunga Mongulbarnü Australia ya Indonesia-i 0-0 draw nung soita yutet, shirnok taoba Bresthostibarnü opening matchi par linük nung asayadang Bharain-i 1-0 agi koka liasü.

Japan ya Australia indang group nung lir aser Bharain den away nung asayadang 5-0 agi takok ngua lir, shirnok Premier League nung asayar Wataru Endo (Liverpool), Kaoru Mitoma (Brighton) aser Daichi Kamada (Crystal Palace) nungertem Japan asoshi tetenzük nungi asaya liasü.

South Korea-i Oman madak 3-1 agi takok ngua World Cup 2026 qualifying nung mezüng takok nguogo, kong Tottenham captain Son Heung-min aser Wolves forward Hwang Hee-chan nati goal agüja liasü.

24th NSD Martyrs' Memorial Trophy nung team 43-i shilem agitsü

Kohima, Rongjui/Sept. 11 (TYO): 24 buba NSF Martyrs' Memorial Trophy 2024 nung Manipur state nungi team toku densema team 43-i shilem agitsü jangjaogo.

Iba football asayamung ya "Goal for Peace" omen nung ajemdaker Indira Gandhi Stadium Kohima nung September 14, 2024 nungi October 5, 2024 tashi asayatsü lir.

State asoshi takum bendanga agütsüba kaketshir Lt. Kekuojalie Sachü aser Lt. Vikhozo Yhoshü nungtem nung iba asayamung ya küm shia Angami Students' Union (ASU) ajanga ayongzüker.

September 14, 2024 nikongdang 5:00 ako nung Nagaland Deputy Chief Minister Y Patton-i iba asayamung tenzüka sentong moatsütsü aser aji masüadang nikongdang 4:00 ako nungi curtain raiser alitsü.

Iba mapang Naga Students' Federation (NSF) tir Medovi Rhi-i 'solidarity message' agütsütsü aser ASU tir Khriesamhalie David Mere-i pela agizükba o jembitsü.

Iba sentong nung organizing committee convenor Vizokho Zashümo menden alitsü aser ASU games & sports secretary Metebo-o Sote-i shilem agiba team tem den tenangzüktep agitsü.

Iba asayamung curtain raiser nungya Vetho, Moko, Mengu, Guru Gee, Tutu, Litsuku, Vidi & Vivo aser 15th NAP (IR) Mahila Band nungeri shilem agitsü.

NSF Martyrs' Park Kohima nung naro yutsüba aser nisan asongba sentong September 14 anepdang 8:00 ako nung alitsü.

Iba asayamung champions nem senpet sen 3 lakh, runner-up nem sen lakh 1.80 agütsütsü. Semi-finalists team shia nem sen 40,000 agütsütsü aser quarter-finalists team shia nem sen 25,000 agütsütsü.

Iba den külemi best midfielder, defender aser top scorer nem sen 10,000 agütsütsü aser Player of the Tournament nem sen 50,000 agütsütsü.

Iba dak sendakba nung September 12, 2024 nikongdang 2:00 ako nungi tenzüka IG Stadium, Kohima nung technical briefing alitsü.

Asian Champions Trophy 2024: India nunger semi-finals tongogo

Moqi, Rongjui/Sept. 11 (Agencies): Defending champions India-i Bodhbarnü preliminary round tasembuba nung Malaysia madak 8-1 agi takok anguba sülen Hero Asian Champions Trophy hockey tournament indang semi-finals asoshi qualify süogo.

Bodhbarnü Moqi, China nung Hero Asian Champions Trophy round tasembuba nung Rajkumar Pal-i hat-trick agütsütetba ajanga Indian Men's Hockey Team-i Malaysia madak 8-1 agi akok.

Rajkumar Pal-i minute 3, 25 aser 33 buba nung goal agütsüba den külemi Arajjeet Singh Hundal-i minute 6 aser 39 buba nung goal ka-ka agütsü, Jugraj Singh-ia minute 7 buba nung goal ka, Captain Harmanpreet Singh (minute 22 buba) aser Uttam Singh-ia minute 40 buba nung goal ka-ka agüja liasü.

Iba asaya nung akokba ajanga India ya points table nung asaya asem nungi points toku bener temaba jenjang nung lir. Malaysia atema Akhimullah Anuar-i minute 34 buba nung goal ka ya agüja liasü.

India-i iba asaya kanga junga amokbangteta first half nunga 5-0 agütsür liasü.

Quarter tasembuba nunga kasa yimya nung asayateta

liasü. Open play mapang Vivek Sagar Prasad-i zükloksüba Malaysian goalkeeper Adrian dak tsükdaker adokba Rajkumar-i maongka agia pa asoshi iba asaya nung goal tasembuba agüja liasü.

Second half nung Malaysia asoshi Akhimullah Anuar-i minute 34 buba nung goal ka agütsütet.

Ajisüaka India nungeri iba sülen goal ana agütsüsema quarter tasembuba 8-1 nung tembang.

India-i tasemben takok anguba indang lemsatepba mapang Hero of the Match, Arajjeet Singh Hundal-i, "Asaya ajak nung onoki yamai takok nguner, onoki asaya ajak akoktsüla, aser ibaji onok team senden nung sentong yanglu. Onok takok angui arua lir. Taoba asaya ana jangratemra masü, saka tanü goal agütsüteta kanga pelar aser tajungba asayatsü imlar," ta ashi.

Team trok aliba sayamung ya round-robin format nung asayar aser temaba jenjang nung aliba team pezü semi-final September 16 nü asayatsü aser final ya September 17 nü asayatsü.

India ya iba asayamung nung asaya pezü buba Bresthostibarnü Korea den asayatsü.

BILEMDANGANG

"Tang tensa den mapetba mechi tesüba mapatem meindoktsüla."